



Zernez Energia 2020

Our dal fondo Zernez Energia 2020 vegnan concessas regularmaing contribuziuns a proprietaris d'abitaculs illa fracziun da Zernez. Daspö gün 2014 fin la fin da lügl 2016 sun gnüts concess ils seguaints imports per las singulas spartas: rimplazzamaint da fanestras: chf 11'646.10 (17 contribuziuns); sanaziuns dal tet: chf 36'360.00 (6); sanaziuns energeticas: chf 47'415.00 (2); indrizs solars: chf 12'808.00 (4); indrizs fotovoltaics: chf 880.00 (1); boiler cun pumpa da chalur: chf 2'250.00 (1); rimplazzamaint s-chodamaint e solar: chf 6'350.00 (1). Da las cussagliaziuns per sanaziuns energeticas han 15 partidas fat adöver. Il cumün ha surtut ils cuosts totals da chf 14'095.50 per las cussagliaziuns. In tuot stan a disposiziun minch'on raduond chf 100'000.00 sco contribuziuns per promover sanaziuns energeticas d'abitaculs.

Iniziativa dal pövel - planisaziun locala

Als 24 gün 2016 es entrada ün'iniziativa dal pövel suottascritta da 105 votantas e votants dal Cumün da Zernez. La pretaisa da l'iniziativa tuna seguaintamaing (citat): "As basond sün la decisiun da l'on 1983, sto la suprastanza cumünala adattar la ledscha da fabrica e las prescripziuns da zonas in quella fuorma, chi nun es plü pussibel da s-chaffir novas pussibilitats d'elavuraziun, d'explotaziun e da depositar materials da fabrica (primars e da s-chart) in nos bel cumün. Quista pretaisa dess valair per la nouva zona in Cul, ma eir per tuot las otras zonas o eventualas novas zonas da mansteranza in nos cumün!"

La suprastanza ha tut cogniziun da l'iniziativa e decis sco prüm pass da relaschar üna zona da planisaziun sur tuot il Cumün da Zernez. Implü cuntinuan ils respunsabels dal cumün cun l'elavuraziun da l'iniziativa.

Provedimaint electric Zernez, part "nord" - decisiun da princip

Süls 1. schner 2016 sun its in vigur ils uordens e las tariffas pel provedimaint electric da la fracziun da Zernez. Tal es in possess dal cumün. Il planisader cumünal, il büro d'indschegners Brüniger a Cuaira, ha preparà ün concept per la part al nord dal cumün. Quist concept sta eir in connex cun l'intent da las Ouvras Electricas Engiadina OEE, da fabricar oura e per part metter suot terra las lingias dal provedimaint electric. Il concept pel Cumün da Zernez prevezza investiziuns ill'infrastructura electrica i'l import dad 1.8 milliuns francs d'ürant ils prossems 5 ons. In seguit s'ha calculà ün plan da finanzas cun resguardar quistas investiziuns ed implü las investiziuns ordinarias i'l provedimaint electric, eir pels prossems 5 ons. Tenor quella calculaziun as po preverer chi nun augmanta il predscha da transport illa fracziun da Zernez. In quists calculs nu sun integrats cuosts extraordinaris, sco per exaimpel quels dal concept chi cumpiglia la part "süd" dal cumün (fin Carolina, Arduond, Prazet ed Ova Spin). La suprastanza ha approvà il concept „nord“ dal provedimaint electric per la fracziun da Zernez e rinvià il proget a man dal preventiv d'investiziuns 2017 respectiv dal plan da finanzas.

Provedimaint electric - reglamaint d'organisaziun per la fracziun da Zernez

Il reglamaint d'organisaziun pel provedimaint electric da la fracziun da Zernez es eir gnü preparà dal büro specialisà Brüniger a Cuaira. Il reglamaint es gnü approvà retroactiv süls 1. lügl 2016. Sco maina gestiun es gnü elet il chanzlist Corsin Scandella. Plü tard füss lura l'idea da surdar quist'incumbenza al nouv manader da las gestiuns tecnicas. Implü es gnü decis da suottametter l'organisaziun da la planisaziun e dal mantegnimaint da l'iglüminaziun publica in tuot las quatter fracziuns al maina gestiun dal provedimaint electric.

Proget "fibra da vaider Zernez" – seguonda part

D'ürant la prümavaira 2016 es gnüda realisada la prüma part dal proget "fibra da vaider Zernez". In quella part sun gnüts colliats ils büros da las gestiuns tecnicas in Cul cul Center cumünal in Urtatsch. Causa las fich bunas experiencias chi s'ha fat d'ürant la realisaziun e davo pro la gestiun, ha la suprastanza deliberà il credit per realisar la seguonda part dal proget. In quella part vegnan colliats il bogn da famiglia, la scoula ed il Center da Sport cul Center cumünal.

Reparaturas vi da las funtanas Eras Sura e Funtanivas a Lavin

Las funtanas dal provedimaint d'aua aint illa Val Lavinoz sun in ün stadi desolat. Davo diversas masüraziuns ed eir visitas ocularas insembel cun specialists s'ha stuvü decider da sanar amo avant l'inviern las duos praisas da quistas funtanas. Implü as sto far eir ün'investiziun pro la lingia d'aua da Funtanivas fin pro la chombra da ramassamaint d'aua, per evitar vacuum aint illa lingia. Causa l'urgenza da las sanaziuns ha la suprastanza deliberà il credit necessari per chi possa gnir cuntinuà cun la planisaziun ed organisaziun da las sanaziuns. Davo cha las lavurs sun terminadas, gnarà preschantà a la radunanza cumünala üna dumonda per ün credit retroactiv.

Via Davo Röven - surdatta rait s-chodamaint da chalur

Davo cha la populaziun ha decis in sen positiv per sanar la centrala dal s-chodamaint a distanza, han ils respunsabels decis da metter aint illa via da Davo Röven ün büschen chi collia la lingia existenta tanter las chasas da Nagy e Cuonz e la lingia progettada nouva aint illa via d'Engiadina. Il credit extraordinari per quistas lavurs es gnü concess.

Achüsa OEE SA cunter ils cumüns a regard cuosts da transport/concessiun

La fin da lügl 2016 es entrada üna achüsa davart da las OEE SA a Zernez cunter ils cumüns da S-chanf, Zernez, Scuol e Valsot. Quista achüsa concerna la dumonda d'adöver gratuit da la rait electrica d'ota tensiun tras ils cumüns, in connex culla cumpra e vendita d'energia a cliants i'ls cumüns. Ils cumüns pertocs han decis da's laschar rapreschantar cumünaivelmaing dal cusgliader giuridic Fadri Ramming da Cuaira in quista chosa.